



## 阿婆畜个豬仔

豬仔，係人類蓋早就開始畜个頭牲。雖然豬仔無像牛仔會搵手犁田，無像馬仔會擲車走恁遽，毋過，佢盡有經濟價值，也係祭拜時節重要个牲儀。故所，頭擺家家戶戶加減都有畜幾頭豬仔。

豬仔在諺語裡肚也輒常出現。像「耕田愛畜豬，畜子愛讀書」、「養子不教不如養驢，養女不教不如養豬」、「養子毋讀書，毋當畜條豬」，都係講在農家畜豬仔分家業興旺，後代子孫係無用功讀書，斯會比豬仔還毋值哦！又有講「還生食四兩，當過死後食豬羊」、「在生食一粒番豆，過贏死後拜豬頭」就係奉勸世人愛賢孝，莫等到爺衰過身咁，正準備修菜个祭拜牲儀，到該時就來毋掣咁。

阿婆屋下也畜幾下頭豬嫲，在屋脣同糞缸黏共下个豬欄，係每擺去便所都愛經過个所在。雖然隔等柵門，豬仔「gong' gong' gong'」緊鼻个鼻公毋會揆著佢，愛行過去時佢本本驚到會死！還細咗等阿婆屎背尾，看佢將剝綿綿个豬菜同燥糠炒好，用杓嫲一勺一勺舀入飼料槽肚，豬仔像餓壞咁緊來搶食，莫怪會用「豬接杓」來形容盡好插嘴个人。

佢等總係誤會豬仔厝糟、懶尸，豬欄裡背臭澎澎，這實在愛怪厥主人。阿婆盲中風以前，不時會洗豬欄；阿婆發病過後，就換大阿舅會去洗。洗豬欄時先攪大大桶井水，順續將大細隻豬仔沖沖洗淨；再將佢等逐共下，將地泥个豬屎搓淨來。洗淨過後，豬嫲眠在淨澈澈个豬欄，一隻隻細豬子尋著乳頭咁乳，你做得看著佢等嘴角全在噓。

豬仔正經食多拉(lai')多，豬屎味係難免个！硬(ang)仰仔洗，還係有味緒。佢在都市大个，比毋得阿婆鼻慣咁。每擺佢撚等鼻公嫌臭，阿婆會笑咪咪，搵一下額前个頭那毛，塞入髻髻，慢慢仔講：「這兜豬仔，係若二阿舅讀書个註冊費，係三阿舅討心白个聘金，係細阿姨行嫁个嫁妝，仰會臭呢？」

作者：吳秀梅

### ☆詞彙學習☆

【頭牲】teu' sen'：泛指家禽、家畜。

【臭澎澎】cu pang' pang'：臭氣沖天。

【牲儀】sen' ngi'：祭祀用的牲口。

【淨澈澈】qiang gid' gid'：非常乾淨。

【糞缸】bun gong'：上廁所的地方。

【搵】boi'：撥開。

【屎背尾】sii boi mi'：背後。

【行嫁】hang' ga：出嫁。

【杓嫲】sog ma'：舀東西的器具。

### ☆文法學習☆

【硬仰仔】ang ngiong' e'：再怎麼……。 「硬(ang)」為「再、更」的意思，後面通常加動詞，表示動作的重複或持續加強。文章中的「硬仰仔」意為「再怎麼……(也)……」，表示無論如何，狀態都不會改變。例：硬仰仔講（再怎麼說）、硬仰仔恁（再怎麼想）。